

**DRAF / RANCANGAN
AWIG – AWIG
DESA ADAT BUNGAYA**



**DESA ADAT BUNGAYA
KECAMATAN BEBANDEM
KABUPATEN KARANGASEM**

DESA ADAT BUNGAYA

Kantor Sekretariat : Pura Desa (Bale Agung) Desa Adat Bungaaya

HP. 087863088474 / 085337187472 / 087863057767

PRATHAMA SARGAH

Haran lan wewidangan Desa Adat Bungaya.

Pawos 1.

1. Desa puniki mawasta Desa Pakraman Bungaya, selantur ipun kinucap kalih kawastanin sajeroning lekita Desa Adat Bungaya.
2. Wawekon prabunian Desa Adat Bungaya mawanang matur Desa manut sekadi kinucap ring sor puniki
 - Ha. Tepi siring wetan/kangin panepin desa Padang Kerta, Desa Jungstri.
 - Na. teping siring kidul/kelod penepin desa Subagan, Desa Asak
 - Ca. tepi siring kulon/kauh penepin tukad Buu
 - Ra. Tepi siring kaja/kaler penepin desa adat Bebandem
3. Sajeroning wamekon/adat Bungaya wenten makudang bebanjaran suwang-suwang, mawasta Banjar Pakraman/Peputusan utawi Banjar Ada luiarne.
 1. Banjar Adat Desa
 2. Banjar Adat Kelod
 3. Banjar Adat Subagan
 4. Banjar Adat Timbul
 5. Banjar Adat Tengah
 6. Banjar Adat Beji
 7. Banjar Adat Telaga
 8. Banjar Adat Papung
 9. Banjar Adat Sesana
 10. Banjar Adat Abian Soan
 11. Banjar Adat Kecicang Bali
 12. Banjar Adat Darma Karya
 13. Banjar Adat Darma Laksana
 14. Banjar Adat Bukit
 15. Banjar Adat Geria Gunung
 16. Banjar Adat Tri Wangsa Kecicang

DWITYA SARGAH

Pakukuh lan Patitis Tatujon

Pawos 2.

Maka pakukuh Desa Pakraman Bungaya merajegang, mikukuhin, kalih ninindihin pisan:

1. Pancasila, pinaka Dasar Negara Republik Indonesia
2. Undang-Undang Dasar 1845
3. Tri Hita Karana

Pawos 3.

Desa Pakraman/Desa Adat Bungaya ngemanggehang patitis tatujon luwir ipun.

1. Ngutamayang tata cara me-agama Hindu
2. Ngewangun katreptian sajeroning Desa Pakraman/Desa Adat mangda pasidan ajeg katreptiang praja.
3. Ngawerdiang kawicaksanaan minakadi kaprajnyanan maka larapan gumawe gemuh lan luhung praja (gemah ripah loh jinawi)
4. Ngemanggehang kalih ngawerdiang padrumeyaning Desa, majalaran kawicak senan guna laksana manut Darma Pramerti.
5. Ngerajegang dharma agama miwah dharma negara

TRI SARGAH

Sukerta tata pakraman

Palet 1.

Indik Krama

Pawos 4.

1. Sane kasinanggeh krama desa pakraman Bungaya luwirne
 - a. Sang sapisira hungi jenek magenah ring wangwekon desa pakraman Bungaya lintang ring tigang sasih utawi 105 dina sane ajeg meagama Hindu
 - b. Sang sapisira hungi wit saking Desa Pakraman Bungaya jenek magenah ring dura desa nanging kantun mipil ring salah sinunggil banjar adat pakraman sane wenten sajeroning Desa Adat Bungaya sane mula pagenahan nyagumi.
2. Papalihan pakraman kadi kinucap ring sor puniki.:
 - a. Krama muwa, krama desa sane bulangkep sangkaning nama ketami madruma hempon ngaci-ngaci ring desa, mejalaran antuk ngamong ngelingang pelaba pura, sane pamupon ipun patut mangge daging pangaci, sangkaning dresta kuno.
 - b. Krama marep, krama desa bulangkep sane sampun mipil ring banjar adat/pakrama sinalih tunggil sane wenten sajeroning desa Adat Bungaya/Pakraman utawi mipil ring desa saha meyahan saurah arih.
 - c. Krama sesabu inggih punika krama desa sane durung mipil ring banjar adat sinalih tunggul banjar adat sane wenten ring wewidangan desa adat Bungaya.
 - d. Krama ring dura desa sang sapa sira hungi wid saking desa pakraman/adat Bungaya jenek magenah ring dura desa luiring desa pakraman Bungaya, nanging manggeh mipil ring banjaran niagumi
3. Krama tamiu inggih punika krama sane kinucap kadi ring sor puniki:
 - a. Sang sape sira hungi saking dura desa luiring desa Bungaya genep magenah ring wewangkon desa pakraman Bungaya tan ngewengku karang paumahan madedunang ring paumahan krama desa, magenah ring paumahan druene guru Wisesa, peteh miwah saluiring ipun lintang ring tigang sasih utawi 105 dina
 - b. Sang sapisira hungi wid saking luaring desa pakraman Bungaya makakubon ngenahin palemahan tegal, carik palasan ring wawengkon desa Bungaya nanging kari magenah makrama desa ring abulan desanya kabuktiang antuk suwala patra sasimahan saking keliang desanya.

- c. Sang sape sira hungi, jenek magenah ring wawengkon desa tamiu tan sareng sepali kramaning desa Bungaya
4. Krama ngajag, sang sapa sira hungirauh kajeroning desa pakraman Bungaya nanging tan nakeh magenah irika patut matur supeksa ring pakraman desa kalih ring sang amawa adat, yan tan asapunika prekanggen desa wenang nundung jaman kinucap mangda matinggal saking desa punika.

PAWAS 5.

- A. Ngawit tedun makrama ring desa pakraman Bungaya.
 1. Krama desa sane mawid kalih jenek ring wewidangan/wewengkon desa pakraman Bungaya mipil ring banjar adat/pakraman sane wenten jroning desa Bungaya melarapan antuk taterangan Banjar, lwirna sampun bulangsap lintang ring tigang sasih utawi 105 dina saking dina rangkat, duaning pinaksa pangundul wiadin petajuh sangkaning ngamongin karang pomahan.
 2. Sang sapa sira hugi wid saking dura desa, magenah ring wewengkon desa pakraman Bungaya sampun lintang ring tigang sasih utawi 105 dina, katerag antuk banjar sane ngemawa pagenahanya.
 3. Krama desa wid saking desa pakraman Bungaya metinggal ke dura desa wastu malih mewali ke desa pakraman Bungaya.
 - a. Yan sangkaning rahayu kalih saking palugrahan prakangge desa patinggale ngawimenang mewali mipil ring banjar sinalih tunggil sane wenten jeroning desa Bungaya nganutin sukretan banjar punika soang-soang.
 - b. Yan sangkaning tan rahayu patinggale nguni yogya klian banjar sane katujon ngatengahang babawose ke desa, mangda kebaosang antuk prakanggen desa, yan katinut tatepasan prakanggen desa punika tur kacihnayang antuk magenah piduka ring Pura Puseh Bungaya utawi kajangan desa prasida kalugra mipil pinaka krama ring desa pakraman Bungaya.
- B. Ngawit tedun madesa adat Bungaya/utawi mapengajeng ngayah ring Pura Balai Agung.
 1. Sane dados tedun medesa adat Bungaya/utawi mapengayus ring Pura Balai Agung kepatutang krama marep lan krama pemurwa.
 2. Krama marep lan krama pamurwa sane dados anggota banjar adat desa.
 3. Manut sane wenten piteket pengelingsir dukke nguni:
 - a. Sampun masomahan tur madue oka
 - b. Nenten masomahan sareng misan, baluan, nyapian, sane cacat angka, mesomahan ping 2
 - c. Nenten wenten cacat angka
 - d. Nenten dados pemangkur ring jama-jama
 - e. Nenten dados pegawai pemerintah
 - f. Manut dresta kemargiang ring pengelingsir desa antuk galah/ sasih ketiga, antuk tanggal, panglong manut pamutus pesamuan desa adat
 - g. Pemargin punika kebawos yosan emping
 - h. Yan sampun manut pemargin yosan emping puniki manut dresna kuno nenten kedadosang nganut saking desa adat punika ngemargiang pengalangan (ngalang).
 - Siki upacara pitra yadnya
 - Kalih upacara manusa yadnya
 - Tiga nenten dados meketis/metirta ring angka

C. Pepaletan anggena Desa Adat:

- Kapertama wau meterag medesa adat mewasta.....
- Kaping kalih utama sampun awarsa mewasta.....
- Ngeraris selanturnyane.....

D. Ring sasih kapat kemargiang pesaluk, utawi upakara/upacara

- a. Saking webaan munggah dados kebayan nyoman
- b. Saking linggih wakebayan nyoman munggah dados wekebayan wayan
- c. Saking mekebayan wayan munggah dados wesalah utawi we manten
- d. Dados we wanten yen polih ngajengin yosan dalem
- e. Dados we salah yan polih ngejengin yosan desa/sumbu
- f. Nenten dados saking yosan ping

Pawos 6.

Usan mekrama desa ring desa pakraman/adat Bungaya

1. Sangkaning Seda
2. Sangkaning pinunas ngeraga, saka polih palugran prekanggan desa pekraman/adat Bungaya
3. Sangkaning kakundul/an.....
4. Telas/kesal utawi tilar saking agama Hindu
5. Nada/nyada sesampun meyusa lintang ring 65 th (.....)
6. Mabukti sungkan tan sidha waras
7. Mabukti iwang saking pamentas (kriminal)
8. Kesepekang saha keeladang antuk desa

Pawos 7.

1. Swadarmaning krama desa

Ha. Krama desa murwa, ngamongin hemponan sane ketami nglingang ngamel padruean desa, ngelaksanayang saluiring karya sane mula kagaduh antuk krama murwa, taler, mapayahan matanduran pinaka krama marep.

Na. krama marep yogya keni paayah-ayahan, tata turun nyumek nanggra seraja karya desa manut ungguan sowing-sowang

Ca. krama sesabu yogya ngaremba seraja karya sane kapucuhin antuk krama desa marep, yen nenten pabuat saking desa kahunadikayang antuk prekanggan desa.

Ra. Krama balu lanang wiyadin istri keni paayah-ayahan kalih tata turun hasile yan balu punika ngamong karang. Kawekas yan okane lanang wiyadin istri sampun antes mayahan, patut krama balu punika mayahan matata turun cumek bulangkep antuk pianak (diatur di Br. Soang-soang).

Ka. Krama tamu sane meagama Hindu, yogya ngaturang panakub di Desa ngemasa-masa senagken tetiwakan gung artha manut tetiwakan desa yan wenten jagi mecikang wewangunan/usaba.

Da. Krama desa sane ring dura desa yogya ngaturang penakub ke desa adat manut tetiwahan saking prekanggan desa manut pamutus pasamuan

Ta. Krama sane tan meagama Hindu tan sareng sapolikramaning desa nanging tan wenang piwal ring awig-awig paswaran desa miwah pamutus perarem desa sane ngindikang tata pawongan kalih palemahan.

Sa. Krama desa yogya saturut ring daging awig-awig Desa Adat Bungaya paswara miwah pamutus perarem desa ngusahayang mangda kasidan mapikolih sekadi patitis, tatujon desane kinucap ring kayun, tunas mamanguhang kejagatitaning praja.

Wa. Krama desa sane pacang ngadol palemahan carik tegal miwah sane siosan sane magenah sajeroning wewidangan desa adat Bungaya, ngadol ring anak saking dura desa, hugi mangda polih palugran saking desa adat, yan tan asapunika, sang ngadol wenang denda manut pengendikan sang ngawarat tur sane ngadol punika kajala antuk desa.

2. Phala – peksaning krama Desa

Ha. Krama desa samiyan polih pasayuban wiyadin kesimahan saking desa saluiring wyawaharanyanya yogya kebawosan antuk pekraman adat desa manut tata titining wyawahara (masalah).

Na. Krama Desa Samiyan wenang ngelaksanayang/ngemargiang Pamer Yadnya, sajaroning Desa Adat manut Desa kala patra, sastra agama, miwah nganutin sitan Desa hinucap

Ca. Krama Desa murwa, marep wenang polih bagian layuban aci-aci saluirinipun twas-twas miwah sawosan sane patut katiba ring krama desa.

Da. Mapamangkid naluk tan tedun mayahan yogya saking paglokikan kalih palugrahan prakanggen Desa.

Palet 2.

Indik Prakanggen Desa/ulun Desa

Pawos 8.

Desa Pakraman/Adat Bungaya punika kehemong antuk prakanggen desa luire :

- a. Bendesa utawi klian desa
- b. Wakebayan, wayan lan wekebayan nyoman
- c. Penyarikan desa
- d. Sedaan desa utawi juru raksa
- e.
- f.
- g.

Pawos 9.

1. Sane wenang kehadegang wiyadin kemanggehang dados prakanggen Desa Adat Bungaya luire :
 - a. Krama murwa, krama marep, sane jenek magenah makrama desa Bungaya matata turun saurah-urih ring desa adat Bungaya
 - b. Tan cedangga, sekadi, peceng, perot, cungh lan sapatunggilanipun sane katandangin kebakta saking wahu embasan
 - c. Wikan memamos kalih nyurat aksara Bali utawi aksara latin
 - d. Mabukti tan naken melaksana corah

2. Pidabdab ngedegang prakanggen desa
 - a. Paruman utawi pasamuan desa ngawentenang sasiliran, pengawit paruman desa matujuan sang pacang kehadegang dados panglingsir utawi klian Desa, utawi klian Desa kantos lintangan ring asiki sane katuju antuk paruman desa yogya pamilihan sane akehan yogya turut.
 - b. Mungming ngadegang, pemaden kelian, penyarikan, sedahan utawi juru raksa kalih patengan utawi panglima, saking panudin klian desa sane kabriyukin antuk paruman utawi pesamuan desa, taler sane akehan yogya turut.
 - c. Lawine madek dados prakanggen desa wantah limang warsa ngwit saking dina pamutus pesamuan
 - d. Yan wenten sinalih tunggil piwal kalaning kasudi antuk paruman desa, sang piwal punika wenang katiwakin panglokika, yan tan manut paksanya, yogya kebawosan antuk paruman desa, yan jati tuhu paksanya paruman desa wenang sudi sane siosan
 - e. Tata titi ring desa adat.....

Pawos 10.

Swadharmaning Prakanggen Desa

1. Midabdabin desa, midabdabin krama desa, pacang ngupadi kejagatditan sekala niskala, maka darsana awig-awig desa, pasuaran desa, pamutus perarem desa, nganutin sastra agama Hindu minakadi uger-uger Negara.
2. Ngerencana saluiring sane nyandang pacang wangun, sane patut ayum, manut lokika desa kala patra, sane mabuat, mangda kasidan polih palugrahan Guru Wisesa.
3. Memawosin saluiring, wyawahara sane metu sajeroning desa pakraman Bungaya niwakang tatimbang utawi pamutus bebaos sane yogya kaputusan sajeroning desa pakraman, yan tan kasidan kebawosin ring desa, prekanggen desa mituduhang mangda ngaturang ring guru Wisesa, mangda kebaosin.
4. Mretiaksa, nulingayang separi polah prajuru desa luire: kelian banjar adat utawi Br. pepatusan klian subak, pemangku dalem, pemangku puseh, pemangku desa minakadi sane siosan wenten sajeroning wewidangan desa adat Bungaya
5. Midabdabin saluiring pemargin haci-haci desa adat bungaya taler nulingayang krama desa indike ngelaksanayang panca yadnya.
6. Prakanggen desa wenang nyanggra saluiring pituduh, minakadi seraja karya saking guru wisesa, merat utawi ringan seyogya katiwak ring desa adat Bungaya.
7. Nanggra seraja karya ritatkala karya agung ring pura besakih, saluiring sane puput nandang/nyandang pacang rauh ke Desa Adat Bungaya

8. Pinaka duta pacang matemuang bebawos ring sang sape sira hugi yan paining punika kapineh nyandang pacang marginin
9. Wenang ngewangun lang-lang desa, utawi pecalang desa sane patut ngelanglangin utawi meretyaksaang seraja karya desa taler patut nulinge katreptian semsewewengkon desa adat Bungaya.
10. Prakanggen desa patut mawinten manut pamutus pesamuan, mejaya-jaya ring pura Puseh Desa Adat Bungaya. Dewasa pawinten manut pamutus pesamuan (manut dresta desa).

Pawos 11.

Phalepeksaning Prakanggen Desa.

1. Luput daging miwah salwiring mawijilan wiyadin paturunan
2. Wenang polih tuwas-tuwas
3. Miwah sane sanosan manut pamutus paruman utawi pesamuan desa adat Bungaya.

Pawos 12

Indik ngadegang dulun/ulun desa utawi pengajeng Desa, minakadi swadharmaning pengejeng Desa.

1. Sane wenang kadegang pengajeng desa inggih punika, manut kuna dresta desa Bungaya (kebyan)
2. Siwa dharmaning pengajeng desa Bungaya
 - a. Ngajengan yosan (manut pemargin yosan desa Bungaya)
 - Yosan Dasa/Kaler
 - Yosan Dalam/Kelod
 - Taler yosan sane lianan manut kuna dresta desa Bungaya

Pawos 13

Prekanggen desa, ulun desa, pengajeng desa kagentosin utawi usan majalaran antuk:

1. Seda
2. Mabukti sungkan rahat
3. Mepinunas tutug sengker pengadege
4. Sangkaning kausanan antuk paruman utawi pesamuan desa Bungaya

Palet 3

Indik Sangkepan, Paruman, Pesamuan

Pawos 14

1. Mungging sangkepan, paruman, pesamuan Desa Adat Bungaya magenah ring Pura Puseh, Bale Agung, Wantilan Desa, wiadin genah sane siosan.
2. Mungging antuk raina/galah kekayunin utawi kaputus antuk prekanggen Desa Adat Bungaya.

Ha. Sane patut tedun sangkep, paruman, samuan puniki:

 1. Prekanggen desa, klian desa, penyarikan desa
 2. Sedaan Desa/juru raksa
 3. Klian-klian Banjar Adat
 4. Pecalang Desa Adat Bungaya

- 5.
- 6.
- 7.
8. Sapunika taler sane kabuatang ring prekanggen desa.

Na. maka manggalaning mebawosan sajeroning sangkepan, paruman, pesamuan, prekanggen desa, utawi pengelingsir desa asapunika taler sinalih tunggil sane kesudi ring klian desa.

Ca. yan wenten nyarengin pesangkepan, pesamuan, utawi paruman ring desa adat Bungaya tan wenang kemargiang.

Pawos 15.

Tata kramaning sangkepan, paruman, miwah pesamuan

1. Sane dados saya patut makta pesayaan, canang, utawi capah
2. Yan kepatut nganggen bebantenan, prekanggen desa yogya mituduhang mangda cumawis, saha nuksrahang pedagingin ring sang kapituduh mekarya bebantenan ika
3. Dene Wekebayan, klian utawi saya/sane dados nepek kul-kul, ping kalih.
 - a. Kaprathama sadurung ngawit maturan, pinaka pakeling mangda, gelis tedun, utawi carem/rauh
 - b. Sampun terem, ngeraris haturan punika kehantebang ring sang sane patut ngantebang mabriyuk muspa sareng sami kantos puput
 - c. Kaping kalih swaran tenguan maka cihna sangkepan sampun ngawit
4. Bebawosan sajeroning sangkepan, paruman, pesamuan hugi ngupadi, kerahayuan jagat, minakadi ngerajegang kemarukan Sang Hyang Widhi, mejalaran bawa laksana manut catur dresta, luih ipun desa dresta loka dresta, kuna dresta, miwah sastra dresta
5. Yan wenten sinalih tunggil krama ngetengahang babaosan sajeroning sangkepan, paruman, pesamuan kadamyakang, yan nyandang kebawosin, yogya kebaosin, yan tan nyandang bawosin, santukang ring sang ngawiwitin
6. Sane kinucap pmutus babawosan, yan briyuk sepanggul kanut sang nangkepin, yan tan sapunika, asing akehan wenang turut manut panglokika. Pamutus bawos yogya kalekitaang kelaksanayang manut anggen ipun.
7. Yan tan puput babawosan sajeroning sangkepan kantos ping tiga sangkepan, patut katengahang ke jroning pesamuhan pinaka pamutus panekes.
8. Sangkepan punika babawos sampun puput, yan sampun nimbang pagilis saya kenak saha sampun mebacak.

Palet 4

Indik Kulkul

Pawos 16

1. Sajeroning wewidangan Desa Adat Bungaya wenten bebacakan kulkul, kadi ring sor puniki :
Ha. Kulkul desa kebawos Tegteg Agung utawi ikang kober (tatenguan). Puniki kasuwarayang oleh dane krama desa risedek yosan dangsil utawi yosan gede. Ritatkala dangsil punika memargi, kantos dangsik punika sampun magenah ring Pura Penataran.

Na. Kukul Pura, kebawos kukul ring Pura Puseh utawi kukul ring Pura Balai Agung kasuwarayang antuk dane krama desa ritatkala:

1. Yosan desa utawi yosan seda
2. Pesamuan Desa Adat Bungaya
3. Raina Purnama
4. Taler sane siosan

Ca. Kukul sane kebawos kukul teruna, desa punika kasumarayang ring pengulun teruna, utawi klian teruna/penyarikan teruna, kasumarayang ritatkala wenten petedunan teruna sareng deha.

2. Nepek kukul manut Tri Brata Sandi, Dharma, Siwa, Laksana :

Dharma : swaran kukul maka cihna wiyadin tetenger upacara agama wiyadin yadnya

Na Siwa : swaran kukul maka cihna/tetenger panca yadnya

Ca Laksana : swaran kukul maka cihna/tetenger petedunan

Ra. Kukul banjar utawi tetenger

1. Ring sajeroning banjar adat sowing-sowang madrue kukul/**tategen**, pasu warania manut danging pesangkepan utawi manut sane **kesangkemin** olih krama Br. Sowang-sowang
2. Kukul/tatenger sane wenten ring banjar adat kemargiang olih banjar adat sowing-sowang

Ka. Yan wenten sinalih tunggil manurug, nepek kukul tan manut krama, yoga kebawosan antuk pekanggen desa utama ulun banjar, katiwakin palokikan, hasa pamidanda manut pasuara, utawi manut daging pamutus prakanggen desa/banjar.

Palet 5.

Padruwayan Desa Adat Bungaya.

1. Pura Kahyangan Desa : Pura Puseh, Pura Bale Agung, Pura Dalem, Pura Pasimpenan, Ida Batara Bagus Selonding utawi Ida Batara Lingsir, Pura Mrajepati, Pura Maksan Agung, Pura Melanting, Pura Pasuwikan, Pura Gaduh, Pura Jro Balian, Pura Beji Saga, Pura Batu Sangian, Pura Beji Dedari, Pura Mandukan, Pura Peliyangan, Pura Uma Desa, Pura Sangyang Pemali, Pura Dulun Yeh/Toya, Pura Penyaungan, Pura Pelapuan, Pura Genah Nindih/Pura Genah Weduh , PuraJeron Dewa, Pemaksan, Bale Pakenca.
2. Palemahan sane kaanggen karang pamohan, miwah telajak karang
3. Palemahan sane keanggen setra pakraman utawi saha desa adat, miwah setra pangilang-ilang
4. Palemahan sane kapisukayang ring sang tan maagama Hindu, kanggen karang pomohan miwah setra utawi sane siosan
5. Palemahan sane kaanggen margi, rurung-rurung basing telabah, sajeroning desa adat Bungaya
6. Banjar-banjar adat/pakraman utawi banjar pepatusan sane wenten sajeroning desa adat Bungaya
7. Pasar desa adat, karang suhung sane wenten ring sajeroning desa adat Bungaya
8. Tanah pelaba Pura Puseh miwah tanah ayah desa manut lekita tanah punika
9. Sekancan kelebutan toya, toya anakan, titisan sane dados kahanggen pasucian Bhatara sane dados kaanggen beji, miwah kasalud antuk krama desa, sane dados tantan ke desa adat Bungaya. Sami kadruwenang antuk desa adat Bungaya.
10. Lembaga Perkreditan Desa (LPD)

CATURTA SARGAH
SUKRETA TATA PALEMAHAN :

Palet 1

Indik Tegal, Bangket, lan Karang.

Pawos 18

Palemahan Desa Adat Bungaya mahuger antuk Tri-mandhala, lwire :

1. ha. Uthama mandhala : palemahan sane kaanggen karang pura, wiyadin paryangan.
- na. Madhya mandhala : palemahan sane kaangen karang pomahan, genah wawangunan, sakadi: banjar, sekolah, kantor, rumah sakit, miwah sane sawosan.
- ca. Nista mandhala, palemahan sane kaanggen setra, margi, rurung, tlabah, papunduk, tulak tanggul, miwah sane sawosan. Sahanan palemahan sane wenten ring wawengkon Desa Adat Bungaya, yogya mangda madruwe babeledan wiyadin wates sane pasti.
2. Sahanan palemahan punika, hugi mangda madruwe margi, rurung, papunduk sane dados hentsin.
3. Yan wenten pakarangan pura, pomahan, tegal, carik, miwah palemahan sawosan kabebeng yan madruwe margi, rurung, miwah papunduk, sang madruwe patut ngatehang babawose ka Desa. Prakanggen Desa yogya negdeg, ngutsahayang mangda polih margi malarapan sami suka. Yan patut matumbas, manut pangargan tanah sane kamanggehang antuk sang mawa rat, sami katahur antuk sang mamuwatang.
4. Yan desa pacang ngalinggahang margi, rurung, minakadi makarya margi, rurung desa, saking sampun hingkup paswaran Desa, yan nganggen tegal, carik, miwah palemahan sawosan, wenang tan nahur pangargan tanah punika. Nanghing yan madaging tatanduran, papayon, wawangunan salwire, desa patut ngichen prabeya agung alit panut pamutus parembug Desa kala pinika.
5. Sahaning karang pomahan hugi mangda masengker. Pidabdab nengker, magelang ka dulu. Panengker sane sisi kangin, miwah sisi kaler, patut kakaryanin antuk sang ngenahin karang punika. Sajaba karang ngele, wiyadin lingkehin rurung, palemahan suwung.
6. Sang sapisira hugi ngenahin karang tegehan, patut naku, tegehan, patut naku, tegehe asukat natah dangsah, sane tebenan, wenang nusunin tembok.
7. Telajakan karang patut kapiyara antuk sang ngenahin karang punika sowang-sowang, mangda mapikenoh tur kenten hasri.

8. Yan wenten sinalih tunggil nadya naleksek wiyadin ngaleklek babaledan salwiring babaledan wiyadin wawatesan, lwire: babaledan wiyadin wates pura, karang pomahan, carik, tegal, setra, tlabah, jlingjing, margi, rurung, punduk, miwah sane sawosan, yogya katiwakan dandha manut werat ringan kahiwangane, saha mahayu sane kasaleksek wiyadin kaleklek, kalih mrayascitta sakabwatan sane nandang katiban panangaskara.
9. Yan hana sinalih tunggal ngaletihin, ngarucakin, ngarobedin, ngararabin, palemahan liwaring pomahan padruweyan nane, lwire : ngutang luu, bangkaan, miwah salwiripun, nerongang babanon, yogya katiwakan dandha gung artha manut paswara, tur mahayu sane kaletihan, karucakan, karobedan, raraban hinucap ring hajeng, saha prayascitta sane nandang keni panangaskara.
10. Yan wenten anak ngenahin palemahan sajeroning wawengkon Desa Adat Bungaya tan tinut makrama desa nganutin Awig-awig miwah paswaran Desa, tan kalugra nganggen salwiring padruweyan desa, tan kalugra ngalaksanayang Panca-yajna sajeroning Desa Adat Bungaya, yan tekaning kapatiyan dados sahubang utawi pendhem ring setra pangilang-ilang. Tan polih pananggran krama banjar minakadi panggran Desa.
11. Yan wenten anak tan ma Agama Hindu ngenahin palemahan sajroning Desa Adat Bungaya, patut nganutin Paswaran Desa Adat Bungaya

Palet 2

Indik Kakayonan

Pawos 19

1. Tan kalugra nekteb, ngarebah, wit-witan salwiripun, ring palasan, pategalan, habing, tangkid, miwah genahe sawosan sane kakeker antuk desa. Yan wenten sinalih tunggal mamurug, katiwakan dandha manut lokika, manut paswara, tur taru sane karebah mantuk ka desa.
2. Salwiring wit-witan sane sampun kacirenan wiyadin kasawenin antuk Desa, pacang mangge mapawangun ring Desa, pradene punika karebah antuk sang madruwe, yogya sang madruwe katiwakan dandha, manut lokika, manut paswara, taru wiyadin wit-witan sane karebah mantuk ka Desa, wiyadin ngetang pangarga.
3. Yan wenten wit-witan wiyadin kakayon ngungkulin palemahan anak sawos, sane ngawinang tiyeb, tampyas, ngarobedin, asing kungkulan wenang ngatengahang ka desa, prakanggen desa maritetes saha mituduhang sang madruwe mangda ngracap, nekteb, wiyadi ngarebah. Yan kantos ping tiga pituduh desane tan kalingu, wenang katiwakan dandha sang anikel tuduh, gung artha manut paswara. Kakayon punika prasadha karebah antuk Desa picundhangan.

4. Tanem tuwuh jroning karang pomahan, tan kalugra ipun lintangan ring jan palit solas, wiyadin limang meter. Bungkil ipun adepa agung, wiyadin kalih meter tengah, saking panengkere ngajrowang. Yan mamurug, wenten raris ngatengahang ka desa, yogya sang madruwe katiwakan dandha gung artha manut paswara, saha ngarebah, sajroning tigang rahina saking pamuput babawose.
5. Kakayonan jroning karang pomayan hugi mapyara mangda tan ngaletihin, ngarobedin, mamayen karang sawosan, saking akah kantos dawun ipun. Yan wenten mamurug, tan tulinga ring kakayonan duwe, wenten ngatengahang kadesa, prakanggen desa yogya maritetes, saha nepasin manut panglokika kalih paswaran desa.
6. Yan wenten wit taru mentik kantos ageng ring babaledan, wates salwiring babaledan mwang wates, wenten ngatehang ka desa, patut taru punika karebah, raris pinara tiga, apahtigayang mantuk ka Desa, sang madruwe babaledan apahtigayan sowang-sowang.
7. Yan wenten sinalih tunggal nundungin tanem tuwuh, kakayonan, sane kaswatah pacing mamayen, wenang kabawosang ring sang madruwe. Yan hakas sang madruwe, yogya katengahang ka desa. Prakanggen Desa negdeg tanem tuwuh wiyadin kakayon punika. Yan manut panglokika prakanggen desa yogya tundungin, taler hakas sang madruwe, patut sepat gantungin. Yan jati kadi panwatahe, yogya sajroning tigang dina, karebah picundhangan. Sang madruwe katiwakang dandha gung artha manut paswara, dosane anikel tuduh. Yan tan yukti kadi panwatahe, sang ngatengahang katiwakan dandha gung artha manut paswara, dosanr angadakaken nora, tanem uwuh wiyadin kakayonan punika tan karebah.
8. Yan wenten sinalih tunggal nadya nandur pijer, turus salwiring tanem tuwuh wiyadin kakayonan sane pacang dados ageng, nesek ring babaledan, ring wates, papanduk, hugi mangda masupeksa ring Prakanggen Desa, kalih ring pananding sowang-sowang. Yan tan kalugra, tan kapisukayang, pradene taler kapurug, yogya sang mamurug katiwakan dandha gung artha manut paswara, tur ngamademang tatandurane.
9. Yan wenten krama nandur pijer ring tegal sasakapan, hugi mangda makarya pasobaya ring sang madruwe tegal hinucap. Yan durung panganan mawoh tubuh punika, durung nahen ngalapin woh ipun, raris kajabutan, yogya sang madruwe tegal nahur panjala sawit-sawit, gung artha manut paswara.
10. Sang sapa sira hugi tegal, tan kawasa ngarebah tanem tuwuh sane dados anggen lakar wawangunan, yan tan polih lugra saking sang madruwe tegal punika.

Indik Wawangunan

Pawos 20

1. Sang sapisira hugi krama desa, sawawengkon Desa Adat Bungaya yan pacang ngawangun panengker karang pomahan, patut masupeksa ring panandinge. Yan tan radin, yogya nunas degdegan ring Prakanggen Desa. Prakanggen Desa negdeg saduhajeng sang mawiwara.
2. Wawangunan ring palemahan pecak carik, tegal, palemahan suwung, sane sampun masanggah pawon, palemahan punika prasidha kabawos karang pomahan, dwaning sampun katiwakan pangupakaran karang. Awanan patut madruwe rurung betel ka margi agung, sukat dados pacang ngalintangang papaga, dwaning tan kapatut ngalintangang sawa ring carik miwah tegal. Yan wenten mamurug, yogya prakanggen Desa niwakang tatepasan, mangda sang mamurug mrayascitta palemahan hinucap sane kalintangan.
3. Yan tan masanggah panghuluning karang, kabawos akakubon. Tan yogya genah ngraksa sawa. Yan wenten mamurug, yogya katiwakan pamidandha mangda mrayascitta palemahan punika.
4. Yan wenten sinalih tunggal sang sapisira hugi, pacang ngawangun wawangunan genah ngalaksanayang upacara Agama, lwire : Pura, Masjid, Gereja, Wihara, miwah sane sawosan, hugi mangda wenten lekita palugrahan Prakanggen Desa, kalih lekita palugrahan Guru Wisesa. Yan wenten mamurug kadi kinucap ring hajeng, kabawos tan siddha karya, tan wenang anggenen, tur wawangunan punika yogya wangdeyang.
5. Wawangunan jroning karang pomahan, hugi nganutin tri-mandhala. Uthama mandhala, sanggar panghuluning karang. Mdhya mandhala, pagenahan mapumahan. Nista mandhala, ngaran lebu, jabayan.
6. Tan wenang ngungkulang capcapan wawangunan ka jroning karang pomahan sawosan tani druwe. Yan wenten mamurug, wenten ngatengahang ka desa, yogya prakanggen desa negdeg, saha nipat gantungin. Yan jati lintang, sajeroning selahe rahina saking puput babawose mangda sampun kapastika.
7. Tan wenang nganggen tembok umah wiyadin tembok panengker tani druwe. Wenang ya kasambatsara antuk sang madruwe. Yan hakas tur mamurug sang kasambatsara, yogya katengahang ka desa, kabowosan antuk Prakanggen Desa.
8. Sang sapisira hugi pacang mapawangun nepi ring margi agung, nepi ring rurung desa, yogya wenten lekita palugrahan saking prakanggen Desa, wiyadin lekita palugrahan sang amawa rat. Yan tan poloh lekita palugrahan, padgatakala wawangunan punika dados katundungan tan ngetang prabeyan tatandungan.

9. Sang sapasira hugi krama desa ngawengku karang pomahan, yogya hurati myara kahasriyan lebuw pakaranganya, rurung pentasan pinih sor asukat karangnya ngalanjur.

Palet 4

Indik Wawalungan

Pawos 21

1. Sane kinucap wawalungan, sakancan buron suku-pat sane nadyan kapyara, sakadi, bawi, banteng, kambing, kebo, misa, jaran, miwah sapanunggilan ipun. Taler watek makampid, sane nadya kapyaran, sakadi, ayam, itik, hangsa, dolong, miwah sabacakan ipun.
2. Sang sapasiwa hugi krama desa sane myara wawalungan suku pat, sajabu hasu, tan wenang ngalubar. Sane patut matlusuk, mangda matlusuk. Sane tan patut matlusuk, mangda mategul bawong. Sane patut maglogor, makandang, hugi mangda maglogor wiyadin makandang. Mangda tan ngarucakin, ngaletihin palemahan tani druwe, miwah mamayen krama desa, jana pada. Yan hasu mangda mabelat, lwire makalung bawong, maka cihna wenten sane myara.
3. Sang sapasira hugi krama desa, myara watek suku kalih, watek makampid, yatnain hugi, mangda tan banget ngarucakin, ngaletihin, palemahan, pomahan, tatanduran druwen anak sawos.
4. Tan wenang ngangonang, negulang, hingon-hingin ubuh-ubuhan, ring palemahan tan druwe, minakadi tan sasakapan druwe, yan tan kapisukayang. Sang madruwe palemahan, prakanggen desa, langlang desa, kliyang-kliyang, asing mamanggihin, wenang nambatsara sang madruwe wawalungan ika wenang taban. Prakanggen desa yogya niwakang pamidandha, manut lokika, gung artha manut paswara.
5. Tan wenang ngangonang, negulang ubuh-ubuhan, ring palemahan karang pura, kahyangan salwir ipun, minakadi setra, rurung papunduk, margi, tlajakan tan druwe, palemahan sane kapingitang, karang suhung, miwah sabacakan ipun. Yan wenten mamurug, sang madruwe palemahan, prakanggen desa, langlang desa, kliyang-kliyang banjar, prajuru desa sinalih tunggal, asing mamanggihin, wenang nambatsara, saha naban wawalungan ika. Katengahang ka desa, katiwakan dandha gung artha manut paswara, saha mahayu yan wenten karusak, tur mrayascitta palemahan ika sane nandang prayascita manut panglokika.

6. Yan wenten maubuh-ubuhan sajroning karang pomahan, hugi tlajan mratyaksayang kandang ipun, mangda tan ngawetuwang bhaya, panungkan. Taler mangda hapik, guriten, siksa, mangda tan kantos ngaletihin, ngarobedin, crobo karang pomahan wiyadin palemahan panandinge. Yan wenten mamuruh, tan siksa ring hingon-ingon , miwah kandang ipun, wenang panandinge nambatsara, wenang katengahang ka Desa, Prakanggen Desa nepasin. Wenang katiwakan dandha manut panglokika kalih paswaran desa.
7. Sang sapisira hugi krama desa, ngawangunang kandang wawalungan, buwat adol atuku, yan kandang ayam, itik, miwah sapanunggilan ipun, buwat naluhang, miwah adol atuku, dagingin satus ukud. Yan kandang wawalungan suku pat, dagingan adasa ukud, sowang-sowang, ika wenang jroning karang pomahan. Yan lintangan ring punika daging kandange, tan wenang wangunang jroning karang pomahan, yogya kawangunang ring palemahan sane mawaneng sa sor ipun satus depa saking palemahan karang pomahan, sekolah, kantor, pura kahyangan, minakadi genah sane kakeker wiyadin kapingitang antuk Desa Pakraman Tur mangda maduwe lekita palugrahan saking sang amawa bhumi.
8. Yan wenten wawalungan ngarucakin, ngarug tatanduran, wenang taban. Sang madruwe tatanduran ngatengahang ka desa pramangkin, kabawosan antuk prakanggen desa, saha katiwakan dandha manut lokika paswaran desa.
9. Yan godel banteng, godel kebo, godel misa, durung matlusuk, godel jaran, kambing, miwah sabacakan ipun, durung hantes, tan wenang taban, yan tan ngajak hina ipun. Yogya salabarang ring sang madruwe.
10. Yan bebek, dolong, hangsa, ayam miwah sapanunggilan ipun, ngarucakin tatanduran, taler wenang taban. Indike naban, mangda masaksi, saha kasupeksayang ka desa pramangkin, prakanggen desa yogya mamawosin, niwakang pamidandha manut panglokika.
11. Yan wenten wawalungan ngeleb, mamegat, ngaranjingin palemahan pura, kahyangan, setra, karang pomahan, miwah sane sawosan, lokikanen juga. Yan tan nadya ka lebang, tan yogya taban, wenang salabarang ring sang madruwe. Yan nadya ka lebang, wenang taban, tur katengahang ka desa.
12. Sang sapisira hugi krama Desa Adat Bungaya tan kalugra norongang babanon laletih kandang wawalungan ka tlabah, jlinjing, sane wenten sajroning Desa Adat Bungaya. Yan wenten mamarug, katiwakan dandha antuk desa gung artha manut lokika, saha paswaran desa. Tur sajroning pitung rahina saking pamuput babawose, salantur ipun tan kari sorong laletih miwah babanon punika.
13. Sang sapisira hugi ngarereh hulam ring tukade, ring tlabaha, ring jlingjinge, miwah sahunggwaning hulam sajroning Desa Adat Bungaya tan wenang nganggen tuba salwir ipun,

tan wenang ngarusak hempelan, nguhukang tamuku, yan wenten mamurug, wenang katiwakan dandha gung artha manut lokika saha paswaran desa, tur mahayu sane karusakang.

14. Sakancan dadandhan, dadosan, sane mungguh ring hajeng, sami mantuk ka Desa Adat Bungaya

15. Sang sapasira hugi tan menang nembak sahananing paksi, yan wenten mamurug wenang huni denda (desa adat).

Palet 5

SUKRETA PAMITEGEP

Ka ping 1

Pamidandha miwah dadosan patedunan

Pawos 22

Pamidandha wiyadin dadosan tedunan, sangkepan, tedun makarya miwah sane sawosan, nganutang sukreta sowang-sowang, lwire:

1. Yan prakanggen desa madruwe patedunane, yogya nganggen sukretan desa, sane kagaduh antuk prakanggen desa, dadosan ngaranjing ka desa.
2. Yan babanjaran madruwe patedunane, yogya ngangge huger sukretan banjar sowang-sowang sane sampun kagaduh antuk banjar punika. Dadosane ngaranjing ka banjar.
3. Yan subak madruwe patedunane, yogya nganggen huger sukretan subak, sane sampun kagaduh antuk subak sowang-sowang, dadosane ngaranjing ka subak.
4. Yan sekeha-sekeha sawosan madruwe patedunane, yogyangangen huger sekeha sowang-sowang, dadosane ngaranjing ka sekeha.
5. Yan wenten krama sinalih tunggal tan tinut ring tatepasan miwah dadosan punika, wenang babawose katengahang ka desa, prakanggen Desa yogya mamawosin.

Kaping 2

Indik Bhaya

Pawos 23

1. Sane kinucap Panca-bhaya, lwiripun : Jiwa bhaya, aghni bhaya, toya bhaya, artha bhaya, bhayu bhaya.
2. Salwiring bhaya wenang geherang antuk swaran kulkul.
3. Sang sapasira hugi krama desa sane manggihin, wyadin huning ring panangkaning bhaya, ring kang katiben bhaya, wenang ngegerang nepek kulkul manut kakulkulan bhaya, raris damyakang ring wadesa.
4. Rikala wenten swaran kulkul bulus tatenger bhaya, krama desa patut yatna, sayaga, saha sregep ngamong prabot wyadin gagawan sowang-sowang.
5. Yan sampun tatas ring bhaya punika, krama desa patut matatulung nambakin, wiyadin ngamesehin bhaya punika, manut hunggwan, kalih manut patuduh sang yogya ngawiwenangang.
6. Sang sapasira hugi tan kawasa majajabur ri kalaning desa, krama desa, katiben bhaya. Yan wenten sinalih tunggal kacirenan mamurug, yogya katengahang ka desa, wiyadin katur ring sang amawa bhumi, mangda kabawosan.
7. Yan pinganan bhaya punika sampun kapineh nahnah, tan pacang nengkalen, wenang kacihnayang antuk swaran kulkul lambat atuludan, wiyadin pasiyar saking sang ngawiwenangang.

Kaping 3

Inding Rarampagan

Pawos 24

Sane wenang rampag, lwire : taru sane mabuwat pacang mangge wawangunan ring pura Puseh, rarampon ron busung, sahang, minakadi sane sawosan. Hunggwan kalih pidabdab ngarampag, mungguh sajroning paswaran Desa Adat Bungaya.

Kaping 4

Pananggran Banjar, Krama Desa

Pawos 25

1. Saraja karyan Banjar kasanggra antuk krama banjar sowang-sowang kahunadikayang antuk kliyang banjar.
2. Saraja karyan desa, kasanggra antuk krama desa, kahunadikayang antuk Prakanggen Desa, karombo antuk kliyang-kliyang banjar.

PANCAMA SARGAH

SUKRETA TATA AGAM

Palet 1

Indik Kahyangan

Pawos 26

1. Pura Puseh Bungaya, Bale Agung Bungaya, Pura Dalem Bungaya, kahemponin antuk desa, indik pangaci-aci manut kruna dresta gagaduhan kalih paswaran Desa Adat Bungaya.
2. Hulun suwi, papayon kalih pangaci-aci kahemponin antuk krama subak sane nungsi Bhatara ring Hulunsuwi punika sowang-sowang.
3. Pura-pura, kahyangan, sane sawosan ring sane kinucap ring hayun, papayon kalih pangaci-aci kahemponin antuk krama pamaksan pura sane nungsi Bhatara ring pura kahyangan punika sowang-sowang.
4. Mungging beji, papayon kalih pangaci-acinya, kahemponin antuk krama desa sane nabeng nalud toya punika, kabawos pamaksan utawi sekeha beji.
5. Yen wenten karecehan, wicara, sajroning pamaksan pura, beji, kahyangan, subak, sinalih tunggal, wenang katengahang ka desa, prakanggen desa mamawosin, nahsahang, nepasin wicarane, mangda kasidhan mawali landuh jatimula.
6. Tan wenang nguwah nguwuhin wawilangan palinggih Bhatara, sane sampun wenten ring pura kahyangan sowang-sowang, mangda kantun manggeh kadi kuna.
7. Yan wenten pura kahyangan sinalih tunggal, reneng pangaci-acinya, katos kadasa warsan, yoga prakanggen desa mamawosin, maritetes, ngutsahayang mangda kasidhan mawali kadi jatimula. Nanging prada tan kasidhan, majalaran antuk pamutus pasamuhan desa, prasidha Desa ngawangunang pangupacara mralina Pura punika, mangda tan karanjangan kaumahin antuk Ki Bhuta Kubandha.

SUKRETAN PURA KAHYANGAN

Pawos 27

1. Ri kalaning maturan hamung Pamangku ring kahyangan punika sane dados munggah tedun ring palinggih-palinggih pura kahyangan hinucap, minakadi sang sampun polih lugraha saking Prakanggen Desa. Yan wenten mamurug, katiwakan dandha mrayascitta palinggih punika.
2. Pamangku sane patut ngantebang babanten ring Pura, wantah pamangku sane kadruwe antuk Pura punika. Yan nenten wentem pamangku ring Pura punika, utawi kapyalang, dados narad pamangku sawosan, saking palugrahan Prakanggen Desa.
3. Tan kalugra masumpah, ma coran, sajroning pura kahyangan sinalih tunggal, sajaba sangkaning wicaran pura hinucap, taler saking pabuwat krama pamaksan Pura, utawi pabuwat Krama Desa sane ngempon pura punika.
4. Tan kalugra wak capala, hasta capala, pada capala, miwah sapanunggilan ipun, sajroning pura kahyangan. Yan macihna wenten mamurug, wenten raris ngatengahang ka desa, yogya tiniwakan dandha pamarisuddhan kahyangan.
5. Tan kalugra malaksana kantos ngawetuwang byota ring pura kahyangan. Yan wenten mamurug, kantos maywadi ring pura, yogya tiniwakan dandha gung artha manut pangargan beras adasa kg. kang sawiji, saha marisudha kahyangan punika.
6. Sang sapasira hugi kacuntakan, salwiring cuntaka, yan durung mabresih, tan kalugra ngaranjing ka Pura Kahyangan. Yan katenger wenten mamurug, yogya tiniwakan dandha marisudha kahyangan punika.
7. Sedahan hengengan miwah sapanunggilan ipun tan kalugra maseha ring Pura Kahyangan sinalih tunggal. Yan wenten mamurug, yogya dandha gung artha manut paswara, saha ngawangdeyang maseha.
8. Tan kalugra ngawentenang kaklecan, jajuden, sajroning suter pura kahyangan. Yan wenten mamurug, sang ngalaksanayang katur ring sang amawa rat, tur kaklecan jajuden punika kawangdeyang.
9. Tan kalugra makta salwiring sane kasinangah tan suci ngaranjing kajroning suter Pura Kahyangan. Yan wenten mamurug, yogya sang mamurug marisudha Pura punika
10. Sang sapasira hugi ri kalaning makemit, ring Pura Kahyangan, yan merem, tan kalugra madukan lanang istri, sajaba anak sane kapineh kari alit durung rumaja putra. Yan mamurug keni dandha manut pangargan beras adasa kg. tur mrayascita pura punika.
11. Pamaksan sowang-sowang Pura Kahyangan sawawengkoning Desa Adat Bungaya kalugra madruwe sukreta ndiri-ndiri, nganghing tan dados singsal ring pasukretan Desa Adat Bungaya

12. Pura kahyangan tan wenang anggen sajaba ngalaksanayang upacara Agama Hindu. Yan wenten mabhukti mamurug, sang makasana kawangdeyang, tur pakardhinane kapuceh, saha sang ngalugrahin kadandha manut pangargan beras adasa karung, maweweh ngawentenang upacara panangaskara pabresihan.
13. Yan wenten macihna anak wiyadin sang sapisira hugi, katedunan utawi kapangluh sajroning pura kahyangan sawawengkoning Desa Adat Bungaya mababawos minangkenang pangandikan Ida Ratu Sasuhunan utawi Bhatara, ring gelis tunasang tirtha laluputan mangda gelis hudep. Pirade sasampun kaketisin tirtha, kantun ngatemel masera-masero, ngawetuwang sumandeya kayun pamaksane, irika patut pintonin. Indike mintonin, hambalang toya apane, celebang liman nane makakalih. Yan mabukti tan belus, nandang gega pangandikan Bhatara. Yan pade belus, tan nandang gega, gelisang gingsirang genahang mangda doh saking pura punika.

Palet 2

Laluputan

Pawos 28

1. Luput piturunan punika mateges tan keni piturunan salwir ipun ri tatkala Desa Adat Bungaya ngangkat karya maprabeya saking piturunan Krama Desa. Sapunika taler ritatkala ngaci-aci salwire sane dados hemponan krama desa sareng sami.
2. Sane luput piturunan, lwire :
 - ha. Prakanggen Desa.
 - na. Pamangku Desa.
 - ca. Klian, Penyarikan, Petengan lan sami Pangelingsir Desa (Prewayah)
- ra. Sang sapisira hugi sane kapineh antuk Desa patut nandang polih laluputan, manut paswara.

Indik Cuntaka

1. Sang sapasira hugi krama desa, sane kahanan cuntaka, tan wenang ngaranjing ka Pura Kahyangan, ka panuciyon kalaning nuci gening, minakadi genah salwiring genah sane kinucap suci pingit. Tan wenang ngaryanin saji salwiring saji sane pacang katur ka sanggar tawang, sakadi suci gening, minakadi banten salwiripun sane jaga katur ka pura, miwah sane katur ring pitra pindha. Mungging banten sane pacang katur ka Prajapati, Dalem panguluning setra, dados karyanin ring umah sang cuntaka kalaning ngupakara sawa.
2. Lwir sane kinucap cuntaka :
 - ha. Anak istri kalaning ngrajaswala, suwen cuntakane, saking ngawit ngrajaswala, katos nat, macihna sampun malukat.
 - na. Sang nganten lanang istri, suwene cuntaka, ngawit saking rahina pangantenane, wiyadin rahina marangkate, katos puput mabyakawon, saha samayut prayascita, malukat matirtha.
 - ca. Rama renta cuntaka sangkaning madruwe oka. Sane lanang cuntaka, suwene saking mbas anake alit, katos kepus hodel nane. Raris malukat. Sane istri pinaka rena, cuntaka petang dasa kalih saking wuhu mbas rarene.
3. Cuntaka malarapan antuk kasedayan, kapatiyan :
 - ha. Yan sang ngarepin, minakadi sang magenah sajroning karang pomahan sang seda, suwene cuntaka, saking wawu seda katos puput panglemek karyane, mawaneng malih tigang dina. Punapike mapendhem, lwih yan atitiwa. Macihnayang punah cuntaka antuk marerebu, malukat.
 - na. Sang polih ninjo, ngarap sawa, ngamel saha ngarembat saheteh-ete upakara pula-palaning sawa, cuntaka adina, punah cuntakane macihnayang antuk malukat.
 - ca. Yan sang manjing mijil ring umah sang ngraksa sawa, sasuwen sawa wiyadin layone karaksa, pateh cuntakane kadi sang ngarepin sawa ika, luwih yun tunggil sidhikara, pateh cuntakane kadi sang ngarepin sawa ika.
 - ra. Yan manjing mijil ring umah sang ngraksa sawa wiyadin layon, sangkaning aninjo, punah cuntakane sasampun husan masiram.
 - ka. Yan sang polih nembah sawa, mangan prasida sawa, punika taler kabawos cuntaka, suwene cuntaka katos sasampun husan malukat.
4. Cuntaka sangkaning malaksaba mamitra ngalang. Suwene cuntaka salamine mamitra ngalang.

5. Anak wetu sangkaning smara dudu utawi tan pawidhi widhana pawiwahan, babinjat, punika taler cuntaka. Suwene cuntaka, salamine durung wenten meras, wiyadin nuduk ngangkenin piyanak, utawi nganggen dadaman.
6. Cuntaka sangkaning mabhukti madruwe panungkan sane tan sidha waras salamine, kadi hangganing hila, buduh, ngawijilang reged saking silit, bhaga, purus, tan henap mameras, brung borok tahunan mabaneh, miwah salwir punika. Suwene cuntaka, salamine tan waras.
7. Cuntaka sangkaning cedangga sane kabakta saking wawu mbas saking garbhawasaning ibu. Punika tan kawenang napak palemahan panuciyan genah nuci gening.
8. Yen wenten sinalih tunggal sang antuk ngaraksa sawa wiyadin layon, mamanan utawi mapakayun ngarawuhin karya hayu atma-wedana, minakadi mabhakta ring sang wenang kabhaktinin, dados, nanghing tan wenang ngarap, ngarembat, nuwun, ngamel, saupakaran puspa lingga.
9. Yan wenten sinalih tunggal krama desa durung tutug cuntaka kadi hucaping harep, mamurug larangan, yan wenten ngatengahang ka desa, prakanggen desa niwakang pamidandha, yoga sang mamurug marisudha sakabwatan manut panglokika.
10. Yan wenten sinalih tunggal anak istri, sangkaning tan meha ngrajaswala sasampun ring pura, wiyadin ring genah larangane sawosan, raris kacirenan, wenang ya tiwakin dandha tanmeha, yoga marisuddha genah punika, katulung antuk pamaksan pura wiyadin pangemonge sowang.
11. Ri kalaning krama desa tedun makarya, sang kacuntakan hamung dados ring nista mandhalaning pura utawi ring jabayan. Yan mamurug wenang kadandha mrayascita.
12. Yan wenten sinalih tunggal krama desa, kacuntakan antuk ngraksa sawa, wiyadin layon, napkala pagilih pangantosan subak babanjaranya ngaci-aci, ring sinalih tunggal kahyangan desa, pacaruwan ring desa, sadurung tutug sengker cuntakanya, wenang tan tedun mayahan, tan dinosan, anghing yan wenten pasadok sang cuntaka ring prakanggen desa. Yan wus tutug cuntakane, patut naregteg yan kari ngalantur patedunane. Mungging piturunan, wawijilan daging salwir ipun, yoga katahur naregteg sasampun tutug sengker punah cuntakane. Dados kahetang pangarga.
13. Yan cuntaka gamya gamana, prakanggen desa nantosang pamutus sang amawa ret. Yan sampun wenten pamutus saking sang amawa bhumi, ring Desa katiwakan dandha kadi ring sor puniki, lwire : mangda mrayascita raga, genah malaksana, kahyangan desa, miwah desa pakraman. Prada yan dang katiwakan pamidandha mamandal, prasidha desa sane mrayascita desa miwah kayangan, sang mamandal kabawosan ring desa, kichen pamutus antuk prakanggen desa, manut pamutus pararem desa.

14. Cuntaka sangkaning mabhukti salah timpal, cuntaka ragan sang malaksana miwah desa pagenahanya, tutug cuntakanya yan sampun sang malaksana mrayascita panangaskara raga, genah malaksana, desane mrayascita desa.
15. Anak luh beling tan kapariangken, suwene cuntaka kantos lekad rarene saha wenten pangupakara panangaskara kulawisuddha.
16. Yan wenten anak mabhukti nolong smara, cuntaka pateh ring cuntakan gamya gamana.

Indik Dewa Yajna

Pawos : 30

1. Indik pangaci - aci ring Pura Kahyangan sane wenten sajroning wawengkon Desa Adat Bungaya, kahamoning antuk krama desa, manut hemponan wiyadin pamaksan sowang - sowang, sajaba sane kahempon antuk krama desa sami. Swang - swang pura madruwe gagaduhan, pinaka huger pangaci - aci, miwah babanten.
2. Sane yogya muput haci - aci punika, Ida Padandha sane katuhur antuk krama Pura sowang - sowang, minakadi Pamangku Pura ring Pura hinucap.
3. Yan wenten sinalih tunggal pura durung madruwe pamangku, utawi pamangku kapyalang, dados nuhur sinalih tunggal pamangku Kahyangan Desa, prade taler tan mresiddhayang dados nuhur pamangku sawosan manut sima sahunggan-unggan.
4. Pamangku desa, punika wantah pamangku Pura Puseh, Pura Dalem, Pura Desa, sane wenten sajroning Desa Adat Bungaya, kalugra nganteb banten pangodal minakadi sane sawosan ring pura - pura sawawengkon Desa Adat Bungaya, sane mamuwatang, taler manut kawentengan Pamangku.
5. Ri tatkala Desa ngawangun karya Tabuh gentuh, Bhatara Turunkabeh, minakadi karya agung sawosan, desa wenang narad pamangku-pamangku kayangan sakatahe, pacan ngarombo pamangku desa.

Pawos : 31

1. Indik pangaci-aci ring pura Pamrajan, Pahibon, Dadya, punika kahamoning antuk krama desa sajroning sekeha dadya, pamrajan, manut sima drestanya sowang, tan singsal ring ucaping sastra Agama Hindu.
2. Ri tatkala Bhatara turun kabeh, makiyis, pamrajan, pahibon, dadya, tan sareng ngalungayang bhatara, nanghing hugi mangda ngiyas pura saha ngadegang bhatara utawi nejer.

Pawos : 32

1. Beji punika kahaci - hacinan antuk sekeha beji, krama desa sane nalud toya punika. Dina pangodal kalih babanten, manut drestan sekeha sowang - sowang utawi paswara sajroning seka.
2. Yan wenten sinalih tunggal beji tan kahaci - acinin, toyan ipun tan yogya anggen sadhana makaryya sarwwa suci.

Pawos : 33

Aci - aci piodalan, usaba, pasegeh ring Kahyangan Desa, lwire

- Pura Puseh, kala dina
 - Pura Dalem miwah Prajapati kala dina
 - Pura (manut katah pura sane kahamong antuk desa.)
- ha. Aci - aci kasanggara antuk Krama Desa, krama pura utawi pamaksan pura sowang-sowang.
- na. Luwiring babaten, minakadi heed upacara, manut gagaduhan dresta kuna sowang - sowang pura.
- ca. Padaging pacang aci - aci
- Hupon - upon palabha pura, tanah druwen desa Adat Bungaya
 - Piturunan utawi wawijilan krama desa
 - Pioli-oli pagunakayan krama desa
 - Hataran-haturan sangkaning krama suka nirmala
- ra. Pasegeh tunggil kajeng kliwon, purnama tilem, kasanggra antuk pamangku sowang - sowang. Padagingan saking druwe pura, pamaksan. Kahantebang antuk pamangku pura sowang - sowang
- ka. Sane kalugra muput salwiring haci-aci ring Pura Puseh Bungaya, Pura Dalem miwang Prajapati Bungaya, Pura Desa sane siosan wantah Pamangku Desa manut pura soang-soang
- da. Ri kala kabrebean jagate, kagringan, katiben panca-bhaya, pinganan tan mrediddhayang ngaturang haci kadi patute, yogya prakanggen desa miwah pamangku, ngaturang pihunan ring Bhatara, masadhana babanten padhatengan, pacanangan, maka cihna tan pegat haci-acine. Ri wus mawali degdeg jagate, patut ngawangunang upacara Bhatara Turun Kabeh, masasirih makakobok ka sagara giri.
- ta. Yan ri tatkala mamahayu, ngayum papayon, ring pura- pura kahyangan, pinganan tan puput kala dinaning piodhalan, pangacine wenang rangkadang, nanghing padhatengan, pacanangan, tan dados pegatang. Ri wus puput masasapuh salwire, malih mawali kadi kuna.

- sa. Ritatkala yosan/usaba Dalem, sesampun usan, wenang ring soang-soang Banjar Adat ngemargiang pecaruan manut kadi sane sampun wenten /manut deresta kuno
- wa. Sapunika taler yosan/usaba Desa/Sumbu, usabataler ngemargiang pecaruan ring Banjar Adat soang-soang manut dresta kuno.

Pawos : 34

1. Pidabdab ngadegang pamangku :
 - ha. Ngambil saking seserod santana wiyadin katurunan
 - na. Saking pamuwus sasemburan, wiyadin nanjan, sasampun kantos ping tiga.
 - ca. Sangkaning kajujuh saha kabriyukan antuk krama Desa Adat Bungaya
2. Sang sapisira hugi pinaka jan banggul pamangku ring Pura Puseh Bungaya, minakadi ring pura kayangan sajroning Desa Bungaya, mangda pageh ngamel kalih ngalaksanayang sasanan pamangku.
3. Sang sapisira hugi krama desa, sangkaning seserod, sangkaning kasenangan antuk Bhatara polih pawuwus ring sasemburan, minakadi kajujuh kabriyukin antuk krama desa, pacang kaanggen pamangku, yan kari alaki rabi yogya lanang istri mawinten.
4. Sang kasudi pacang kaanggen pamangku, patut mawinten ring Pura genahe dados jan banggul, mungging prebeya kasandangin antuk pamaksan pura sowang - sowang, yan ring Dalem antuk krama Desa Dalem, yan ring desa antuk krama desane sami.
5. Pamangku patut maduruwe hamongan pura sowang - sowang, yan tan madruwe hamongan pura, pasiddha tan kalugra ngantebang babanten ring pura - pura salwire
6. Sinalih tunggal pamangku yan katekan pati, yogya tiniwaken. Patut polih patulung prabeya atiwa, saking krama pura sane kahamonging, agung alit patulungi nganutin pamutus babawos sajroning parareman kala punika. Yan wus tiniwaken, patut kakaryyanang pangelad, wiyadin papekatan antuk krama pura hinucap. Punika yan pamangkune kari rajeg ngamong swadharmmaning pamangku kantos hantaka.
7. Twas-twasan pamangku, mungguh jroning gagaduhan paswaran Desa, pura swang-swang, taler nganutin dresta kuna.
8. Pamangku kagentosin majalaran antuk :
 - ha. Mapinunas mararyyan, saking patut pinunase, nanghing tan kari nglaksanayang dharmmaning Pamangku. Kawekas kalaning seda, tan polih patulung prabeya atiwa.
 - na. Saking patut pinunase, majalaran antuk lingsir, sampun tan mampuh, sungkan rahat tan kengin waras, kajadayang antuk krama pura, wiyadin desa. Kawekas kalaning seda, patut polih patulung prabeya patatiwan.

ca. Sangkaning kahusanang, majalaran antuk laksana mamurug sasanan Pamangku. Kawekas kalaning seda tan polih patulung prabeya atitiwa.

Pawos : 35

1. Indik Sosot.
 - ha. Yan wenetn sinalih tunggal pacang nahur sosot wiyadin punagi, salwiring punagi, gumanti sane patut nganggen pamegat sot, tan dados nahur sot yan tan kalaning dina piodalan Bhatara. Ngadasa dinayang haci - aci, sang pacang nahur punagi patut sampun masadok ring Kliyang Pamaksan Pura, yan ring Kahyangan Desa panahurane, masadok ring prakanggen desa. Panahuran punagi ika, kapuput antuk Ida Padandha sasampun putus banten pangodale/Pemangku Desa.
 - na. Yan wenten sinalih tunggal nahur sasangi pacang ngaturang pangodal, hugi mangda ring dina pagantosan piodalane. Sang nahur punagi, wenang nunas kanti patulung karyya ring pamaksan. Sang nahur sasangi nuksrahang daging cumek saprabeyaning pangodal ring pamaksan pura.
 - ca. yan wenten sinalih tunggal nahur sasangi maturan swaran tangguran salwiring tatabuhan, sasolahan, minakadi salwir ipun, munggwing prabeya punika sami kahangganin antuk sang masasangi.
2. Haturan :

Yan wenten sang sapisira hugi ngaturang jinah, mwan sarupaning barang, punika sami patut kahunadikayang antuk Prakanggen Desa, Kliyang Pamaksanan Pura swang-swang, mangda kasiddhan mapwara hayu. Haturan punika kaungghang sajroning lekita.
3. Sasarin canang

Sasampun puput pangaci-aci pujawaline, sasarin canang punika kapupulang saha kawilangin. Kahunadikayang antuk Prakanggen Desa, Kliyang Pura, indik tatiwak kalih pamarggin ipun, sangkaning jati nirmala.

Palet : 4

Indik Resi Yajna

Pawos : 36

1. Krama Desa Adat Bungaya, yogya ngawreddhiyang kaprajnanan, kaultaman Sang Hyang Aji, asewaka nunas pawarah ring sang maraga widagdha prajnan, pingajeng ring sang kasinangguh guru loka.

2. Prakanggen Desa, Kliyang-kliyang banjar, ngutsahayang kawreddhiyan kamuruban kauttaman Sang Hyang Aji, ngawentenang pasamuhan-pasamuhan, parembugan, pinaka genah krama desa mamanguhang pawarah-warah hayu.
3. Kalaning diwasa hayu, wenang desa atirthayatra, wenang desa ngaturang puniya miwah resi bhojana ring Ida Padandha. Taler kalaning karya utama, ring Desa, salwiring karya sane kaputus antuk Ida Padandha patut ngaturang puniya. Asapunika taler ring sang mapitulung patut maweh dana.
4. Sang sapisira hugi krama Desa Bungaya yan mapakayun pacang mapodgala, taler mangda wenten pasadok pamihuning ring Prakanggen Desa, sajaba patut polih palugrahan saking Guru Wisesa.
5. Prakanggen Desa Bungaya, mamanut pisan, yan krama desane mapuniya ring sang prajnan, ring sang widagha, ring sang satata ngarajegang dharma, pingajeng ring Ida Padandha pasuryan nane sowang - sowang.

Palet : 5.

Indik Pitra Yajna

Pawos : 37.

1. Pamarggi ngupakara sawa, hugi manut linging sastra Agama Hindu, wenten makudang-kudang soroh, sakadi hinucap ring sor puniki:
 - ha. Mapendhem ring prathiwi.
 - na. Makingsan ring ghni,
 - ca. Atiwa-tiwa, utawi palebon utawi ngaben.
 - ra. Yan rare durung makupak huntu, wus kepus hodel hantaka, wenang ngangge pangentas bangbang masadhana klungah klapa gadhing, ngaran ngalungah, tan wenang tiniwaken.
 - ka. Yan rare durung kepus hodel, pamali ngaran, padhem juga tan hana pangupakaranya, kewala ganten utawi hadem paicchan Ida Padandha.
2. Sang sapisira hugi krama Desa Adat Bungaya., tan kawasa makta sawa ka Desa Adat Bungaya, yan sawa ika sampun keni pangupakara sawa. Yan wenten mamurug, yogya katiwakan dandha, mrayascita marisuddha desa.
3. Salwiring upacara atiwa-tiwa, palebon, ngaben, ring setra hugi kawenanganya, tan wenang ring desa Desa Adat Bungaya, sajaba layon Ida Padandha. Yan wenten mamurug, wenang dandha mariduddha desa, krama desa sang atatulung dandha artha 1 juta rupiah, kang sadiri.
4. Yan wenten krama desa ngurug sawa, macamana, mabresih, kawenanganya, tan kalugra lintangan ring tigang sasih ngawit saking dina sedane. Yogya murnnama tilem, miwah salwiring upacara rarahinan. Yan kalaning angurung sawa, sajroning Desa Adat Bungaya, kawangunang Karyya Agung kantos nuci gening, lwire matabuh gentuh, bhatara turun kabeh, karyya Agung ring Basakih, yogya tumpang salune tedunang saking balene, genahang ring natah umahe, saking Bhatara kodhal ngantos Ida masineb.
5. Tan wenang nekeh sawa yan tan macamana, mabresih, lintangan ring roras dina, ngawit saking dinane seda. Yan wenten mamurug, dandha gung artha, saha mrayascita desa.
6. Sang sapisira hugi Krama Desa Adat Bungaya, tan wenang atiwa-tiwa, ri kala pangaci-acin/usaba Desa, luwire : Patirtha patotoyan ring Pura Puseh, Bhatara Turunkabeh, tabuh gentuh, minakadi karyya agung sawosan :
 - ha. Yan piodalan patirthayan ring Pura Puseh, Pura, Pura, saking nigang dinayang aci-aci, kantos Bhatara puput masineb (mecaru).
 - na. Yan karyya matabuh gentuh, bhatara turun kabeh, minakadi salwiring karyya Sane nuci gening, saking ngawit nuci kantos Bhatara puput masineb.

Yan wenten mamureg, dhanda mrayacita desa, minakadi krama desa sane matulung dandha gung artha kang sadiri.

7. Yan wenten krama mendhem sawa kalaning dina malarang, kawasa, nanghing hugi masawen, during masusunin bintak, lakukingsan ngaran/madaging bung-bung.
8. Yang makingsan ring ghni, sawa gineseng, hasti hinanut, manut krama. Yogya ngangge tirtha pabresihan. Mungging dewasa, s asor ipun dewasa dados margginin mendhem sawa.
9. Indik padewasan
- ha. Padewasan mendhem ring prathiwi, makingsan ring ghni, wenang katiwakang antuk Kliyang Prakanggen Desa, wiyadin Kliyang Dalem sowang-sowang manut pasobyaha.
- na. Padewasan atiwa-tiwa, katiwakang antuk Ida Padandha sane pacing muput yogya sampun kapatut antuk Prekanggen Desa
- ca. Indik larangan ngupakara sawa, sajaba nungguhng ka tumpang salu, sane kamanggehang sajeroning Desa Adat Bungaya luwire: Buda Wage, Saniscara Kliwon, Anggara Kliwon, Radite Umanis, Sukra Pwon, Saniscara Wage, Radite Kliwon, ika semut sadulur.
Sukra Pwon, Saniscara Umanis, Radite Pahing, ika kala gotongan
Yan ring dora, mwah ring tanggal panglong ping 15, tanggal panglong ping 14, mwah tanggal panglong ping 1. Wrehaspati, nuju tanggal, panglong, ping 1, 8. Yanring Wrehaspati, ingkel wong. Yen wenten sinalih tunggal mamurug, wenang dandha gung artha 1 juta rupiah, saha mrayascita desa.
- ra. Tan wenang ngagah ngulung, teges ipun, sajroning setra tunggil, tan dados mresihin sawa, nuju dina pangutangan yan ring setra punika wenten ngalaksanayang pangabenan. Yan wenten mamurug, dandha gung artha saha mrayascita setra.
10. Yan wenten sawa tan kaparihangken ring wewengkon Desa Adat Bungaya hingaranan bedagan desa, yogya prekanggen desa nguduhng krama desa mendhem ring setra pangilang – ilangan, sasampun polih lugraha saking sang amawa rat. Kicen bubuh pirata saking desa
11. Yan sawa sangkaning salah pati, angulah pati, mati kapangawan, minakadi salwir ipun, desa tan ngalarangin, yan sawa punika tiniwaken, premangke. Sara ledang sang madruwe, minakadi Ida Padandha sane pacang muput.
12. Yan wenten sinalih tunggal sawa, genahe seda wiyadin padem sajabaning karang pomahan, luwire: ring tegal, ring carik, pasar, pura, banjar, sekolah, minakadi genah sawosan dudu karang pomahan, yogya sang madruwe wirange mrayascita marisuddha genah punika. Yan sawa tan kaparihangkenan, genah punika patut kaparisuddha kaprayascita antuk sang madruwe hemponan.

Pawos : 39

Indik angatma wedhana.

1. Sang sapisira hugi krama Desa Bungaya, yan kalaning angatma wedhana, lwire : Ngaroras, patilemang, baligya, tan wenang ngawangunang payajnan, petak ring, ring palemahan Pura Kahyangan Desa, minakadi kahyangan sawosan.
2. Sang sapisira hugi wis ngawangun karyya angatma wedana, yogya karang payajnan Ika kpralina, sakasep ipun petang dasa kalih dina saking dina karyyane
3. Ngaben, yan wenten sinalih tunggil krame, ngelaksanayang pangaben tan dados maring karang papomahan

Palet : 6

Manusa Yajna.

Pawos : 39.

1. Sang sapisira hugi krama desa Bungaya ngawangunang salwiring upacara manusa yajna, tan wenang magenah ring wawidangan palemahan kahyangan paniwiyang Desa. Yan wenten sinalih tunggal mamurug, wenang dandha artha 200 ribu rupiah saha mrayascita marisuddha pura punika.
2. Sane kalugra mawinten magenah ring pura sinalih tunggal, sang sapisira hugi krama desa sane pacang kahadegang dados pamangku, pinaka jan banggul bhatara ring pura kahyangan hinucap. Taler sane kahadegang pinaka prakanggen Desa, wenang mawinten majaya – jaya ring pura puseh utawi rin pura genah soang-soang.
3. Indik manusa yajna sane dados kamargiyang sajrening Desa Adat Bungaya hugi sane nganutin dresta kuna minakadi sastra agama.

Palet : 7

Bhuta – Yajna

Pawos : 40

1. Sajroning Desa Adat Bungaya pacaruwan manut hunggwan, kalih sor singgih, lwire :
ha. Pacaruan Desa sadakala
 - Manca satha ngamasa – masa, kala tileming kasanga, magenah ring
 - Manca – sanak, ngalimang masa, kala tileming kasanga, magenah ring

- Tabuh gentuh, ngadasa masa, kala tileming sasih kasanga, nuju rah windu.
- na. Pacarun desa padgatakala, ri kala jagate kabrebehan, kagringan, kadurmanggalan, katiben panca-bhaya, miwah sane sawosan sane patut caronin.
- Ca. agung alit caru, manut hunggwan acaru, babwatan pacaruwan, kalih nista madhya uttamaning caru.
- 2. Pacaruwan irng pura – pura kahyangan, pamrajan, dadya, salwire, manut drestan pura sowang – sowang, minakadi awig – awig gaguduhan pura hinucap.
- 3. Pacaruwan ring banjar – banjar Adat, sajeroning desa Bungaya kala dina usaba-usaba manut Sasih katiga, ngararis pacaruwan ring karang pomahan sowang – sowang.
- 4. Yan wenten sinalih tunggal pura kahyangan, salwire, reneng pacarune kantos tigang plabuh, wenang prakanggen desa mamawosin. Yan wus puput babawose yogya maguru piduka, ngawit masasapuh, mangda kasidhhan ngaturang pangaci – aci.
- 5. Yan wenten sinalih tunggal banjar adat, reneng pacarune kantos tigang plabuh yogya Kliyang desa utawi Kliyang Dalem sane ngawiwenang mamawosin yan tan puput babawose, yogya katur ka Desa, pranggen Desa mamawosin tur ngicenin pamutus.
- 6. Pacaron kalaning Tilem Kasanga, ring karang pomahan sowang – sowang manut sastra dresta, kalanturang antuk brata panepiyan.

SAT SARGGAH
SUKRETA TATA PAWONGAN

Palet : 1

Indik Rangkat

Pawos 42.

1. Indik rangkat punika, manut desa kala patra, mwanng dresta, sane kapatutang tur katinutin antuk krama desa sowang – sowang, tan singsal ring uger – uger panagara.
2. Sajroning desa Adat Bungaya indik rangkat ika yan sampun mawidhi widana pawiwahan, sanistanya mabiyakawon tur malukat, rangkat punika kasinaggah puput palikrama.
3. Yan wenten anak istri krama desa adat Bungaya karangkatang antuk sang sapisira hugi, lwiw antuk anak saking dura desa, yan kantos tigang dina saking dina matinggale saking jumah tan wenten pasadok, pajati, yogya sang madruwe wirange nunas kanti ring prekanggen Desa Adat

Bungaya mangda ngamargiyang sasrepan. Yan sampun sinah genahnya, ngraris kamarggiyang panegdeg.

4. Sang sapasira hugi krama Desa Adat Bungaya, yan karawuhan tamyu praya masinutan malarapan antuk ngarorod, hugi mangda masadok mihuningan ring prakanggen Desa, pranggken Desa yogya maritetes, yan sangkaning tan patut pamargin rangkatnya, prakanggen desa nguduhang mangda katur ring sang amawa rat. Yan wenten mamurug, yogya sang mamurug dandha gung artha
5. Yan wenten sinalih tunggal krama Desa Adat, ngamet anak istri antuk mlegandang, mamendet, marikosa, miwang salwir ipun, tan sangkaning sami demen, tan yogya pinuput widhi widhana pawiwahanya sadurung wenten pamutus saking guru wisesa.
6. Yan wenten sinalih tunggal saking dura desa, pacang muput rangkat kawawengkon Desa Adat Bungaya, sang madruwe wirang luh yogya nunas pasaksi ring Prakanggen Desa Adat Bungaya, sinalih tunggal mangda wenten ngarawuhin.
7. Yan wenten sinalih tunggal krama desa adat Bungaya, ngamet anak istri pinaka rabi tan manut sima dresta minakadi sastra agama, yogya katur ring sang amawa rat mangda kabawosang saha polih pamutus.
8. Yan wenten sinalih tunggal krama Adat Bungaya merabian, wenang kesaksiang antuk penjuru adat soang-soang lan dinas.

Palet : 2

Indik belas makurenan utawi napiyan

Pawos : 42

1. Sane kabawos napiyan, punika sang palas marabi, palas makurenan, sane sampun katiwakang pamutus antuk Guru Wisesa
2. Yan wenten sinalih tunggal krama desa, ngarangkatang sapiyan, sadurung tigang sasih utawi 105 dina, saking disa palase, yogya sang ngarangkatang sapiyan punika keni dandha pakerang gung artha
3. Krama desa sane belas marabi utawi makurenan, sasampun polih pamutus saking Guru Wisesa patut masadok mihuningan ring kliyang banjar, mangda kadamyakang ring banjar ring desa, sakasep ipun asasih saking palase.

4. Yan wenten anak istri wit saking wawengkon desa Adat Bungaya, napiyan ring dura desa, mawali kadesanya, yogya sang madruwe wirang matur supeksa ring Pranggen Desa, saha mrayascitta marisuddha anake luh punika. Yan tan kaparisuddha antuk wirangnya, patut marisuddha raga, mangda tan kasinanggih cuntaka.

Palet : 3

Indik Balu.

Pawos 43.

1. Sane kabawos balu, anak istri katinggal seda antuk rabine. Yan anak lanang seda rabinne, wiyadin katinggal napiyan, taler kawastanin balu.
2. Yan wenten sinalih tunggal krama desa lanang balu, wiyadin istri balu, ngawengku karang pomahan, yogya mapayahan asele.
3. Yan wenten lanang balu, ngawengku karang, madruwe santana utawi oka istri sampun hates mayahan, yogya mayahan bulangkep.
4. Yan wenten anak istri balu, ngawengku karang, madruwe santana utawi oka lanang sampun hantes mayahan, yogya mayahan bulangkep.
5. Yan wenten sinalih tunggal anak istri balu, marangkat, yogya rangkat punika kapuputang antuk wirang lakine rihin, yan babalon punika kari pageh
6. Mungging wawenangan babalon luh utawi rangda, ring indik wawarisan, minakadi sane sawos-sawosan, nganutin huger – huger sane karajegang antuk Guru Wisesa.

Palet : 4

Indik santana

Pawos : 44

1. Sajroning Desa Adat Bungaya, ngarajegang pidabdab santana kapurusa siddikara tunggal, paperasan, tunggal dadya
2. Sang sapasira hugi sinaling tunggal krama desa adat Bungaya meras sentana, nuduk mantu, makedihang utawi nerahang raga, yogya sangkanin radin, tunggal siddhikara, tunggal dadya, saha polih palugrahan saking Guru Wisesa.

3. Indik meras sentana, nuduk mantu, nuksrahang raga, sasampun polih palugrahan saking Guru Wisesa, yogya kadulurin antuk upacara manut sastra Agama Hindu.

Palet : 5

Indik wawarisan

Pawos : 45

1. Lwire sane wenang kawarisin :
 - ha. Hamong – amongan ring desa, ayah – ayahan saurah – airh
 - na. Hutang, Pihutang sang kawarisin
 - ca. Saraja druwe, bhrana, tegal, carik, tatamiyan, sakancan kasugihan.
2. Sane wenang ngawarisin :
 - ha. Manut lalintih paprenahan adoh tampek saking purusa tunggal siddhikara tunggal dadya
 - na. Putra dadaman wiyadin putra paperasan
 - ca. Mantu dadudukan, minakadi santana saking nuduk mantu
 - ra. Sangkaning polih pitemes saking sang kawarisin sang madruwe salwir sane dados kawarisang, saking palugrahan Guru Wisesa, pinih akeh apahtigayan saking padruwen nane maka piolah-olah pagunakayan.
3. Sang sapisira hugi krama Desa Adat Bungaya, yan tilar saking Agama Hindu, tan yogya ngawaris sane kamulan patut warisin.
4. Ngedum wawarisan, kapatut sasampun puput mahabenang sang ngawarisang bhrana kalih kasugihan punika. Sane dados dum, sajaba sane mangge padagingan pangaci – aci, minakadi salwiring sane mangge piranti nglaksanayang upacara Agama, pustaka – pustaka sane kapingitang salwiripun.

SAPTAMA SARGGAH
WICARA LAN PAMIDANDHA

Palet : 1

Indik Wicara

Pawos : 46

1. Salwiring wicara indik prakraman, ring wawidangan Desa Adat Bungaya, wenang rinawosan antuk Pranggen Desa. Yan tan kasiddhan puput, Pranggen Desa gnaturang ring Guru Wisesa, bwat matatimbang.
2. Yan wenten wicara indik pakraman ring banjar, pamaksan, subak, minakadi sekeha – sekaha sawosan, yoga kabawosang antuk pranggenya sowang, yan tan kasiddhan puput, wenang katengahang ka Desa, Prakanggen Desa yoga mamawosin.
3. Yan pamutus wicara sane katiwakang antuk prakanggen Desa Adat Bungaya, tan katinutang utawi tan kahiring antuk sang mawicara, wenang sang mawicara nunasang pangrawos ring sang patut mamawosin, ring Guru Wisesa.
4. Yan sang mawicara taler tan tinut ring pamutus wicara sane katiwakang hinucap ring hajeng, prasiddha sang mawicara kaheladang saking Desa, kantos puput wicaranya, dadose mamandal ring Desa.

Palet : 2.

Indik Pamidandha

Pawos : 47.

1. Lwiring pamidandha sane wenang katiwakang antuk Prakanggen Desa, Banjar, Pakraman, Subak, Pamaksan, Sekeha – sekeha sawosan, sawawengkon Desa Adat Bungaya, sakadi ring sor puniki :
 - ha. Dandha artha
 - na. Dhanda ayah – ayahan
 - ca. Upesaksi, Dewa Saksi, Pangrarata, Sumpah
 - ra. Dandha panagaskara, lwire : Mrayascita, marisuddha, miwah salwir ipun.
 - ka. Pamidandha sawosan manut palugrahan Guru Wisesa.
2. Patiwak pamidandha, manut hunggwan wicarane swang – swang, minakadi werat ringan wicara hinucap, lwire :
 - ha. Yan wicara ring Desa Adat, yoga kapidandhan antuk Desa. Munggwing dandhan mantuk ka Desa.

na. Yan wicara ring Banjar Adat, katiwakin pamidandha ring banjar ika, dandhan mantuk ka Banjar

ca. Yan wicara ring Dalem, ring Subak, ring Pamaksan, minakadi ring seha – sekeha sawosan, katiwakan pamidandha ring kuwu tempekanya sowang. Mungging dadandhan mantuk kajroning kuwu tempekanya.

3. Agung alit dandha, manut panglokikan agung alit werat ringan kasisipane, sane mungguh ring awig – awig gagaduhanya sowang, minakadi paswara pinaka pamutus pasamuhian

ASTAMA SARGGAH

NGUWAH – NGUWUHIN AWIG – AWIG

Pawos : 48

1. Sane wenang uwahin punika, pasukretan, paswara, amutus pararem, wiyadin pamutus pasamuhan miwah sane sapanunggilan ipun.
2. Sane wenang ungguhin inggih punika, pasukretan, paswara, pamutus pararem wiyadin pamutus pasamuhan miwah sane sawosan sapanunggilan ipun.
3. Indik nguwahin kalih nguwuhin pasukretan, paswara, pamutus pararem, wiyadin pamutus pasamuhan miwah sane sawosan, manuta tata kramaning pasamuhan.
4. Indik nguwahin kalih nguwuhin Awig – awig, manut tata kramaning pasamuhan, sasampun nunas tatimbang ring Guru Wisesa kalih polih palugrahan sang amawa bhumi.

NAWAMA SARGGAH

PAMUPUT

Pawos : 49

1. Awig – awig puniki mawasta : “AWIG – AWIG DESA ADAT BUNGAYA”
2. Awig – wig puniki pinaka bantang sahananing awig – awig, paswara, pasukertan, miwah salwir ipun, sane mangge ring swang – swang banjar pakraman, pamaksan pura, subak, sekeha – sekeha sane wenten ring sajroning Desa Adat Bungaya
3. Banjar. Kayangan, pamaksan, subak, sekeha – sekeha sane wenten sajroning Desa Adat Bungaya, wenang ngawangunang awig – awig, pasukretan, paswara, gagaduhan, swang-swang, nanhing daging ipun tan yogya singsal tungkas ring Awig – awig Desa Adat Bungaya.
4. Salwiring sane durung mungguh ring awig – awig puniki, kaungguhang sajroning paswara, pamutus pasamuhan Desa Adat Bungaya.
5. Dresta kuna sane kari dados angge, yan tan tungkas ring daging awig – awig Desa Bungaya, manut kojaring sastra Agama Hindu, hanut ring Uger – uger nagara, saha kaputusan sajroning paruman Desa Adat Bungaya
6. Awig – awig Desa Adat Bungaya ,pawangun Krama Desa Adat Bungaya kapastika manut upacara Agama Hindu, kala dina, Sasih....., tanggal utawi panglong..... Isaka....., magenah ring Pura Puseh....., kapuput antuk Ida Padandha..... saking Griya
7. Awig – awig puniki kalingga tanganin antuk Prakanggen Desa, Dulun Desa, minakadi Kliyang Desa, Pamaden Kliyang Desa, Panarikan, Sedahan, saha kasarengin antuk Kliyang-kliyang banjar adat, kasaksinin antuk Prabekel Bungaya, Camat Bebandem, Kakukuhang antuk Bupati Karangasem.
8. Awig -awig puniki kalaksanayang ngawit dina, kantos selantur ipun.
9. Lwir sang ngalingga tanganin :

PRAKANGGE DESA ADAT BUNGAYA

De Kebayan Nyoman

De Kebayan Wayan

Penyarikan Desa

Sedhaan utawi Juru Raksa

KELIYANG – KELIYANG BANJAR PAKRAMAN

1. Klian Banjar Adat Desa
2. Klian Banjar Adat Kelod
3. Klian Banjar Adat Subagan
4. Klian Banjar Adat Timbul
5. Klian Banjar Adat Tengah
6. Klian Banjar Adat Darma Laksana
7. Klian Banjar Adat Beji
8. Klian Banjar Adat Telaga
9. Klian Banjar Adat Darma Karya
10. Klian Banjar Adat Papung
11. Klian Banjar Adat Sesana
12. Klian Banjar Adat Abiansoan
13. Klian Banjar Adat Kecicang Bali
14. Klian Banjar Adat Geria Gumung
15. Klian Banjar Adat Tri Wangsa Kecicang
16. Klian Banjar Adat Bukit

MAKA SAKSI :

Perbekel Bungaya

Camat Bebandem

Perbekel bungaya kangin

Kalekitayang ring Kantor Bupati Karangasem

Duk rahina tanggal Masehi

Register Nomor :

Bupati Karangasem

(_____)